

26 SEP 2002

ABDULLAH: TERSEERAH PADA NIK AZIZ SAMA ADA INGIN MINTA MAAF

KUALA LANGAT, 26 Sept (Bernama) -- Datuk Seri Abdullah Ahmad Badawi hari ini berkata terserah kepada kebijaksanaan Mursyidul Am PAS Datuk Nik Abdul Aziz Nik Mat sama ada ingin memohon maaf setelah mengaku kesilapan atas dakwaannya terhadap Perdana Menteri.

Seseorang itu biasanya akan meminta maaf jika berbuat salah, Timbalan Perdana Menteri berkata semasa ditanya pemberita sama ada Menteri Besar Kelantan itu perlu meminta maaf atas kesilapannya mendakwa Datuk Seri Dr Mahathir Mohamad tidak pandai membaca Al-Quran.

Nik Aziz dilaporkan berkata semalam apa yang sebenarnya ingin dikatakan beliau ialah Dr Mahathir tidak tahu berbahasa Arab.

Ditanya adakah wajar seorang pemimpin negeri boleh melakukan satu kesilapan sedemikian beliau berkata: "Kesilapan boleh berlaku. Terserahlah kepada Nik Aziz. Kalau dia (Nik Aziz) silap, dia kena jelaskan kesilapannya."

Timbalan Perdana Menteri juga berkata kini terserah kepada orang yang membuat laporan mengenai dakwaan Nik Aziz itu untuk mengambil tindakan seterusnya memandangkan Nik Aziz telah mengakui kesilapannya.

Ahad lepas Ketua Pemuda Umno Bachok Mohamed Zain Yassim membuat laporan terhadap Nik Aziz atas dakwaan beliau itu pada satu ceramah di Bachok.

-- BERNAMA

RIZ RON